

TE TI'AMĀRA'A PAE FA'ARO'O

*E arata'i nō tō 'oe
mau ti'ara'a mana*

PORINETIA FARANI



*'Ei ta'ata, e ti'amāra'a tō tātou nō
te mā'iti, nō te fa'a'ite 'e nō te ora i
te mau mea tā tātou e ti'aturi nei.
I te rahira'a o te taime, tē fa'ariro
nei tātou i tō tātou mau ti'amāra'a
pae fa'aro'o 'e te mau ti'aturira'a
pae fa'aro'o, 'ei parau tumu tē
arata'i nei i tō tātou orara'a. Mai
tā tātou e ha'afaufa'a nei i tō tātou
iho ha'apa'ora'a 'e tō tātou mau
ti'aturira'a, e ti'a ato'a ia tātou
'ia ha'afaufa'a i te mau ti'ara'a
mana o te mau ta'ata ato'a i te
parau o te ti'amāra'a pae fa'aro'o
'e te ti'aturira'a pae fa'aro'o. Nō
tō tātou 'itera'a i te faufa'a mau o
teie mau ti'amāra'a, e nāhea tātou
e nehenehe ai e fa'a'ite i te mau
parau tumu nō te ti'amāra'a i te
pae nō te ha'apa'ora'a i rotopū i tō
tātou va'ata'ata ? E rāve'a ānei nō
te 'imi i te tahi mana'o tāhō'e 'ia
'āparau ana'e tātou 'e te tahi ta'ata
nō te tahi atu fa'aro'o ?*

TĪTAU I TE HA'AMĀRAMARAMARA'A

Hou 'a pāroru ai 'outou i tō 'outou iho mau tī'aturira'a pae fa'aro'o 'aore rā i tō vetahi 'ē, e mea faufa'a 'ia māramarama maita'i 'outou i te mau tī'ara'a mana 'e te mau parau tumu niu o te tī'amāra'a i te pae nō te ha'apa'ora'a. I roto i teie ve'a iti, tē vai ra te tahi mau ha'amāramaramara'a faufa'a nō ni'a i tō 'outou mau tī'ara'a mana 'e te mau papa o te tī'amāra'a i te pae nō te ha'apa'ora'a. 'A vai ara noa i te mau tauira'a i ni'a i te mau tī'amāra'a pae fa'aro'o 'o tē nehenehe e ha'afifi i te reira, ma te māta'ita'i i te mau parau 'āpī.

FA'ARO'O I TE MAU PAE ATO'A

'A fa'aro'o 'e 'a fa'a'ite i tō 'outou mana'ora'a i te ha'apa'ora'a a te ta'ata 'e tō rātou mau tī'aturira'a mau. Noa atu ē, 'aita 'outou e fāri'i nei i tō te tahi tī'aturira'a 'aore rā mana'o hōhonu, 'a tūtonu noa 'ia māramarama māite 'e 'ia fa'atura ato'a i tōna hi'ora'a. 'Ua rau te tumu te ta'ata e parau ai i te hō'ē mea, e tī'aturi ai i te hō'ē mea 'e e rave ai i te hō'ē 'ohipa. 'Ia ha'apa'o 'outou i te mana'o o te ta'ata e tī'a ai, 'ia fa'ata'a atu 'outou i tō 'outou mau mana'o 'e 'ia onono ho'i 'outou i ni'a i te reira, 'e 'ia ani ato'a 'outou ia rātou 'eiaha e 'ino'ino mai i tō 'outou mau tī'aturira'a pae fa'aro'o mau.

RAVE I TE MAU PEU MAITA'I

Nō te ora maita'i 'ei va'ata'ata e mea ta'a 'ē te mau mana'o 'e te mau tī'aturira'a, e mea faufa'a roa 'ia 'ite 'outou nāhea i te tāu'aparau, 'eiaha e hi'o noa e aha tē tāu'aparau. 'Eiaha te fa'a'itera'a mana'o ta'a 'ē 'ia riro mai 'ei 'ohipa 'aimārō. E tī'a i te mau ta'ata ato'a 'ia 'ite i te peu 'e 'ia fa'atura i te tahi 'e te tahi 'a parau pāpū ai i tōna mana'o 'e 'a fāri'i ai i te mana'o o te tahi. 'Ia 'ore ana'e tō 'outou mana'o e manuia, 'a fāri'i i te mau fa'ahope'ara'a au 'ore nō te reira ma te au 'e te maita'i. 'A ha'amana'o i te pāto'i i te mau huru hāmani-'ino-ra'a ato'a, mai te hāmani-'ino-ra'a tei niuhia i ni'a i te 'iri, te nūna'a, te tī'aturira'a pae fa'aro'o 'aore rā te tī'aturi-'ore-ra'a, 'e te ta'a-'ē-ra'a i te pae nō te hia'ai 'āpeni.

FA'ATĪANI I TE PARAU NO TE MANA'O FĀRĪ'I

Tītau-roa-hia i te ta'ata 'ia ora 'āmui 'e ma te hau, noa atu te mau ta'a-ē-ra'a e vai ra. 'Aita te orara'a ma te hau e parau ē, e fa'aru'e i tō 'outou mana'o ; tē parau nei rā e tūtava i te ora ma te hau 'e te ta'ata 'aita hō'ē ā ti'aturira'a 'e 'outou, 'aore rā 'aita e fāri'i nei i te mau ha'apī'ira'a i niuhia ai te reira. 'A ha'apī'i i te ta'ata 'ati a'e ia 'outou i te mau faufa'a 'e te mau ture nō te peu maita'i ma te 'ore e ani ia rātou 'ia fa'aātea atu, 'e ma te 'ore e fa'atura 'ore i te mau ta'ata ta'a 'ē.

PATU I TE MAU TĀ'AIRA'A TI'ATURI MAU

'A patu i te mau tā'aira'a ti'aturi mau i roto i te va'ata'ata, i rotopū i te mau ta'ata e mana'o 'ē tō rātou. E 'ite a'e 'outou i te mau rāve'a nō te pāruru i tō vetahi 'ē mau ti'ara'a mana, 'e e fāna'o te mau ta'ata ato'a i te ha'amātaura'a i te mau ta'ata e rave rahi atu ā, 'e i te māramaramara'a i te mau ti'aturira'a o te tahi 'e te tahi. 'A tūtonu i ni'a i te mau vāhi 'ua tū'ati'outou 'e tō 'outou mau ta'ata tupu 'e tō 'outou mau hoa tino huirā'atira. I muri mai, 'a rave 'āmui ai 'outou i te 'ohipa, 'a pāruru i te ha'apa'ora'a 'e te faufa'a nō te ti'amāra'a pae fa'aro'o.

TE TI'AMĀRA'A PAE FA'ARO'O I ROTO I TE TURE NŌ TE MAU NŪNA'A ATO'A

Ta'a 'ē noa atu te pārurura'a ti'amāra'a pae fa'aro'o i roto i te mau fenua tāta'itahi, 'ua rau ato'a te mau mauha'a ta'a 'ē, 'oia ho'i te mau parau mana i te pae nō te ture, nō te mau nūna'a ato'a, 'o tē pāruru nei i taua ti'ara'a mana ra. I te matahiti 1948, 'ua 'ōmuahia te parau nō te ti'ara'a mana nō te ti'amāra'a i te pae nō te ha'apa'ora'a 'e te manava ha'avā, e te Fā'ira'a hā'ati i te mau ti'amanara'a o te ta'ata tupu. Mai taua taime ra, 'ua rau te mau fafaura'a 'e te mau fa'aura'a tei ha'amau 'e tei ha'amaita'i i teie ti'ara'a mana nā te ao ato'a nei.

1. E aha te mau pādururura'a tā'u e fāna'o i raro a'e i te ture nō te mau nūna'a ato'a ?

Tē ha'apāpū nei te mau mauha'a nō te mau nūna'a ato'a e mea 'aifāito te mau ta'ata ato'a i mua i te ture, noa atu tā rātou ha'apa'ora'a. Tē nā 'ō ato'a nei taua mau ture ra ē, e'ita roa atu te tahi ta'ata e nehenehe e mata-ē-hia nō tāna ha'apa'ora'a, nō te mea e hapa teie i mua i te tura o te ta'ata 'e e fa'autu'ahia te reira 'ei 'ōfatira'a i te mau ti'ara'a mana ta'ata 'e te mau ti'amāra'a tumu.

2. E aha te mau ti'amāra'a e vai ra i roto i teie mau mauha'a nō te mau nūna'a ato'a ?

- **Te ti'amāra'a nō te mana'o, te manava ha'avā 'e te ha'apa'ora'a.**

I roto i teie ti'amāra'a tē vai ra te ti'amāra'a nō te feruri i nī'a i te mau parau huru rau, te ti'amāra'a 'ia vai tōna mau ti'aturira'a, te ti'amāra'a 'ia ha'apa'o i te hō'ē ha'apa'ora'a 'aore rā te hō'ē ti'aturira'a, 'e te ti'amāra'a nō tōna iho mau mana'o hōhonu. 'Aita te reira e fa'ati'a i te hō'ē noa atu tā'ōti'ara'a i nī'a i te ti'amāra'a ta'ata 'ia fāna'o 'aore rā 'ia fāri'i i te tahi ha'apa'ora'a 'aore rā te tahi ti'aturira'a tāna i mā'iti. E'ita te tahi noa a'e ta'ata e nehenehe e fa'ahepohia 'ia fa'a'ite i tōna mau mana'o 'aore rā tōna tomora'a i roto i te tahi ha'apa'ora'a 'aore rā i te tahi ti'aturira'a.

- **Te ti'amāra'a nō te tau'i i te ha'apa'ora'a 'aore rā te ti'aturira'a.**

E ti'amāra'a tō te mau ta'ata ato'a 'ia fa'aru'e i tā rātou ha'apa'ora'a 'aore rā tō rātou ti'aturira'a nō te fāri'i i te tahi a'e, 'aore rā nō te fa'aea noa ma te ti'aturira'a 'ore. E mea 'ōpani-'eta'eta-hia te fa'a'ohipara'a i te pūai tino, te mau fa'autu'ara'a a te ture, te mau fa'aturera'a 'aore rā te tahi a'e mau ravera'a nō te fa'ahepo i te tahi ta'ata 'ia fāri'i, 'ia tau'i 'aore rā 'ia tāpe'a i te tahi ha'apa'ora'a 'aore rā ti'aturira'a.

- **Te ti'amāra'a nō te fa'a'ite 'e nō te poro i tā 'outou ha'apa'ora'a 'aore rā ti'aturira'a, 'ei ta'ata hō'ē 'e 'ei pupu ta'ata, i te vāhi ta'ata 'e i te vāhi 'ōroto.**

'Ua fāna'o te ta'ata ato'a i te ti'ara'a mana nō te fa'a'ite ma te hau 'e te tura i tā rātou ha'apa'ora'a 'aore rā i tā rātou mau ti'aturira'a i te mau ta'ata ato'a, ma te tītau 'ore i te parau fa'atī'a a te Hau 'aore rā a te tahi atu fa'aro'o 'ē. 'Aita teie ti'ara'a mana i tā'oti'ahia i te mau melo e ha'apa'ora'a tā rātou tei tāpa'ohia i mua i te hau. Hau atu ā, 'eiaha te mau 'āmuira'a fa'aro'o 'e te mau fa'anahora'a fa'aro'o 'ia fa'ahepohia 'ia tāpa'o ia rātou i mua i te hau nō te fāna'o i tō rātou mau ti'ara'a mana.

- **Te ti'amāra'a nō te fa'a'ite i tā 'outou ha'apa'ora'a nā roto i te ha'api'ira'a, te ravera'a, te ha'amorira'a 'e te ha'apa'ora'a.**

'Ua rau te huru o te mau 'ohipa e au i te ti'amāra'a nō te fa'a'ite i tā 'outou ha'apa'ora'a 'aore rā ti'aturira'a, nā roto i te ha'amorira'a, te ha'apa'ora'a, te mau ravera'a 'e te ha'api'ira'a :

- Te ha'amorira'a 'e te ha'apa'ora'a, e haere roa 'ia i ni'a i te mau peu mo'a 'e te mau 'ōro'a 'o tē fa'a'ite i te ti'aturira'a, 'e tae noa atu i te mau ravera'a huru rau e au i te reira mau 'ohipa, mai te patura'a i te mau vāhi ha'amorira'a, te fa'a'ohipara'a i te mau peu fa'aro'o 'e te mau tao'a nō te mau 'ōro'a, te fa'a'itera'a i te mau taipe 'e te ha'apa'ora'a i te mau mahana mo'a 'ohipa 'ore 'e te mau mahana fa'afa'aeara'a.
- Te ravera'a 'e te ha'api'ira'a i tāna ha'apa'ora'a 'e tōna ti'aturira'a, 'o te mau 'ohipa ato'a 'ia e au i te fa'aterera'a a te mau pupu fa'aro'o i tā rātou mau 'ohipa tumu, mai te ti'amāra'a 'ia mā'iti i tō rātou iho mau ti'a fa'aro'o, te mau tahu'a 'e te mau ti'a ha'api'i ; te ti'amāra'a 'ia ha'amaui i te mau piha ha'api'ira'a 'evanelia 'aore rā te mau fare ha'api'ira'a fa'aro'o ; 'e te ti'amāra'a 'ia fa'aineine 'e 'ia 'ōpere i te mau parau pāpa'i 'e te mau parau ha'apararera'a fa'aro'o.

- **Te ti'amāra'a nō te mau metua 'e te mau tīa'i i te ha'afāna'ora'a i tā rātou mau tamari'i 'e te pīahi i te tahi ha'apī'ira'a fa'aro'o 'aore rā te tahi ha'apī'ira'a mōrare e au i tō rātou iho mau mana'o hōhonu.**

E mea fāna'o te mau tamari'i 'ua matara nō rātou te ha'apī'ira'a fa'aro'o 'ia au i te mau hina'aro, i te ha'apa'ora'a 'aore rā i te mau mana'o hōhonu o tō rātou mau metua 'aore rā tō rātou mau tīa'i. Nā reira ato'a, 'eiaha te mau tamari'i e fa'ahepohia i te ha'apī'ira'a fa'aro'o tei tuea 'ore i te mau hina'aro o tō rātou mau metua 'aore i tīa'i. 'Ia au i te fa'auera'a tumu nō te vai-maita'i-ra'a o te tamari'i, e mea ti'a i te Hau 'ia fa'aitoito i te mana'o fāri'i i te mau fa'aro'o ato'a i roto i te mau fare ha'apī'ira'a 'e 'ia fa'atīani i te fa'aturara'a i te raura'a 'e te ta'a-ē-ra'a o te mau fa'aro'o e vai ra.

3. Tē vai ra ānei te mau tā'oti'ara'a nō teie mau ti'amāra'a ?

'Ē. E mau tā'ōti'ara'a tei tu'uhia e te ture, 'e tō te reira fā, 'o te pānurura'a 'ia i te vai-maita'i-ra'a o te huirā'atira, i te nahonaho, i te ea, i te mōrare 'e i te mau ti'ara'a mana tumu 'e te mau ti'amāra'a o vetahi 'ē. Terā rā, 'eiaha te mau 'ōpanipanira'a 'ia fa'ahepohia nō te mata-ē-ra'a i te tahi, 'aore rā 'eiaha 'ia fa'a'ohipahia nō te mata 'ē i te tahi.

TE TI'AMĀRA'A I TE PAE NŌ TE HA'APA'ORA'A 'E TE HA'AMORIRA'A I PORINETIA FARĀNI

4. E aha te ti'ara'a mana nō te ti'amāra'a i te pae nō te ha'apa'ora'a 'e te ha'amorira'a?

Te ti'ara'a mana nō te ti'amāra'a i te pae nō te ha'apa'ora'a, e parau tumu ia 'o tē turu i te ti'amāra'a o te hō'ē ta'ata nō te ti'aturi 'aore rā nō te ti'aturi 'ore i te tahi ha'apa'ora'a. Tei roto ato'a i teie ti'ara'a mana te ti'amāra'a o te ta'ata 'ia rave i te te ha'apa'ora'a tā rātou i mā'iti, 'aore rā 'ia tau i tā rātou ha'apa'ora'a i te taime noa atu e hina'aro rātou.

5. E aha te ti'ara'a mana nō te ti'amāra'a o te manava ha'avā?

Te ti'ara'a mana nō te ti'amāra'a i te pae nō te ti'aturira'a, 'o te ti'amāra'a ia o te tahi ta'ata 'ia tāpe'a i te mau faufa'a, te mau parau tumu, te mau mana'o, te mau ha'apa'ora'a 'e te mau ti'aturira'a 'o tāna e hina'aro, ta'a 'ē noa atu te huru hi'ora'a o te tahi atu mau ta'ata.

6. E aha te mau ture e pāroru i te ti'amāra'a pae fa'aro'o?

I Pōrīnetia Farāni, teie te mau ture e pāroru nei i te ti'amāra'a i te pae nō te ha'apa'ora'a 'e te ti'amāra'a o te manava ha'avā :

- Te Īrava 10 o te Fā'ira'a o te mau ti'ara'a mana o te ta'ata 'e o te tino huirā'atira nō te matahiti 1789 ;
- Te mau Īrava 1, 5 'e 16 nō te Ōmuara'a o te Papa ture nō te 27 nō 'Ātopa 1946 ;
- Te Īrava 1 o te Papa ture o te 4 nō 'Ātopa 1958.

Tē ha'apāpū nei taua mau ture ra i te ti'amāra'a i te pae nō te ha'apa'ora'a 'e te ti'aturira'a, ma te fa'atiani i te parau nō te mana'o fāri'i i te mau fa'aro'o, 'e ma te pāroru i te ta'ata i te mata-'ē-ra'a, nō tōna ti'aturira'a 'e tōna mau mana'o hōhonu pae fa'aro'o ato'a.

7. E aha te ha'apa'ora'a mana i Pōrīnetia Farāni ?

'Aore hō'ē noa ha'apa'ora'a mana i Pōrīnetia Farāni. E ti'amāra'a tō te ta'ata 'ia rave i te mau huru ha'apa'ora'a ato'a e vai ra.

8. E aha tā'u e nehenehe e rave 'ia 'ōfatihia tō'u ti'ara'a mana nō te ti'amāra'a i te pae nō te ha'apa'ora'a 'e te ha'amorira'a ?

Mai te peu 'ua 'ōfatihia te ti'ara'a mana nō te ti'amāra'a i te pae nō te ha'apa'ora'a, e nehenehe te ta'ata e horo i terā 'ohipa i mua i :

- Te Tiripuna Hau, mai te peu ē nā te tahi ta'ata ti'ara'a nā te hau i 'ōfati i te ture,
- Te tiripuna tīvira 'aravihi, mai te peu nā te tahi ta'ata ti'ara'a unuma i 'ōfati i te ture,
- Te mūto'i 'aore rā te 'Auvaha ture nō te rēpūpirīta, mai te peu te 'ōfatira'a e hara rahi.

TE HA'APA'ORA'A I TE MAU VĀHI TA'ATA

9. E nehenehe ānei tā'u e fa'a'ite i tō'u mau mana'o i te pae nō te fa'aro'o, i mua i te ta'ata ?

'Ē. E nehenehe te mau ta'ata ato'a e fa'a'ite i tō rātou mau mana'o i te pae nō te fa'aro'o i mua i te ta'ata, mai te peu ē e'ita taua mau mana'o e ha'afifi i te orara'a huirā'atira 'e 'aita ato'a te reira e ha'afifi i te ti'amāra'a, 'aore rā te mau ti'ara'a mana o te tahi.

10. E nehenehe ānei tā'u e hōro'a 'e āore rā e poro i tō'u mau ti'aturira'a i te tahi ta'ata ?

'Ē. E nehenehe te mau ta'ata ato'a e fa'a'ite 'aore rā e poro i tō rātou mau ti'aturira'a ia vetahi 'ē.

11. E nehenehe ānei tā'u e fa'aō iā'u i roto i te tahi ha'apa'ora'a fa'aro'o 'aore rā te tahi pupu fa'aro'o ?

Ē. I raro a'e i te ture nō Pōrīnetia Farāni, e ti'ara'a tō te mau ta'ata ato'a 'ia 'āmui i te mau 'ohipa a te tahi ha'apa'ora'a fa'aro'o 'aore rā te tahi pupu fa'aro'o. E ti'amāra'a tō te mau melo nō te fa'aru'e i te hō'ē ha'apa'ora'a 'aore rā te hō'ē pupu mai te au tōna hina'aro.

12. Mea nāhea te mau pupu fa'aro'o i te fa'aturehia i Pōrīnetia Farāni ?

Nā te fa'auera'a mana nō te 16 nō Tēnuare 1939 tei ha'amaui i te mau 'Āpo'ora'a fa'atere a te mau misiōni fa'aro'o (parauhia te « Fa'auera'a mana Mandel ») e fa'atano i te mau ha'apa'ora'a fa'aro'o i Pōrīnetia Farāni. 'O te Tōmitēra Teitei o te Rēpūpirīta i Pōrīnetia Farāni te ti'a a te Hau e hi'o nei i teie mau ha'apa'ora'a fa'aro'o.

TE TI'AMĀRA'A PAE FA'ARO'O I TE VĀHI RAVERA'A 'OHIPIA

13. E aha tē parau nō te ti'amāra'a i te pae nō te ha'apa'ora'a, i roto i te tahi paoti 'ohipa 'e tōna rave 'ohipa?

'Ia au te Papa ture o te 'ohipa, e'ita te paoti 'ohipa e nehenehe e hi'o i te ha'apa'ora'a a tōna rave 'ohipa i te taime 'a tihepuhia ai 'oia. Hau atu ā, e mea ti'a 'ore i te ture te fa'autu'araa 'aore rā te mata-ē-ra'a i tōna rave 'ohipa nō tāna ha'apa'ora'a.

14. E aha tē parau nō ni'a i te ti'amāra'a pae fa'aro'o 'e te mau hora ravera'a 'ohipa ?

Nō te mau rave 'ohipa a te Hau : E mea ti'a i te mau rave 'ohipa a te Hau i te mā'iti 'ore i te pae. Nō reira 'eiaha roa atu rātou e fa'a'ite i tō rātou mau ti'aturira'a pae fa'aro'o, 'eiaha ato'a e rave i te reira i ni'a i tā rātou 'ohipa. Terā rā, e nehenehe e fa'ati'ahia te tahi mau fa'atanora'a i ni'a i te mau hora 'ohipara'a a te mau

rave 'ohipa a te hau maoti te parau nō te ti'amāra'a 'ia ha'amori, mai te peu ē e tuea te reira i te tere-maita'i-ra'a o te piha 'ohipa a te Hau.

Nō te mau rave 'ohipa e 'ere nā te Hau : E nehenehe te rave 'ohipa e ani i te tahi fa'atanora'a hora 'ohipara'a nō te fa'a'ōhiera'a i te ravera'a i tāna ha'apa'ora'a. E nehenehe te paoti 'ohipa e fāri'i i te reira, terā rā 'e'ere i te tahi fa'ahepora'a. Hau atu ā, e nehenehe te paoti 'ohipa e 'ōpani i te mau pure ato'a mai te peu te reira i roto i te mau hora 'ohipara'a 'aore rā mai te peu e fa'ataupupū te reira i te 'ohipa a te tahi atu mau rave 'ohipa. Terā rā 'aita te paoti 'ohipa e nehenehe e 'opani i te tahi rave 'ohipa 'ia pure i roto i tāna piha 'ohipa i te taimē fa'afa'aeara'a mai te peu 'aite te reira e ha'afifi i te terera'a 'ohipa.

I rāpae i te mau hora 'ohipara'a, e ti'amāra'a tō te rave 'ohipa i te rave i tāna ha'apa'ora'a.

Teie te mau mahana mo'a 'ohipa 'ore i Pōrīnetia Farāni :

- Te mahana nō te taera'a mai te 'Evanelia
- Te mahana pae mo'a 'e te Mōnirē nō Pāta
- Te mahana maha nō te Ma'uera'a
- Te Mōnirē Penetetōte
- Te mahana nō te 'Āfa'i-tino-ra'a-hia 'o Maria
- Te mahana nō te Feiā Pohe
- Te mahana Noela

15. E nehenehe ānei tā'u e 'ō'omo i te tahi 'ahu fa'aro'o i te 'ohipa, 'e e pāto'i i te 'ō'omora'a i te tahi tuha'a 'ahu fa'aau, nō tō'u mau ti'aturira'a pae fa'aro'o?

Nō te mau rave 'ohipa a te Hau : 'eiaha te mau rave 'ohipa a te Hau e 'ō'omo i te tahi noa atu taipe, te 'ahu iho ā rā, tei fa'a'ite i tā rātou ha'apa'ora'a.

Nō te mau rave 'ohipa e 'ere nā te Hau : E fa'ati'ahia 'ia 'ō'omo i te tahi taipe 'aore rā te tahi 'ahu fa'aro'o. Terā rā, e nehenehe te paoti 'ohipa e 'ōpani i te tahi mau 'ahu 'aore rā te tahi mau fa'anehenehe ('aore rā e fa'ahepo 'oia i te 'ō'omo i te tahi mau 'ahu), nō te pārurura'a, te ea 'e te aupuruāea. E'ita e fa'ati'ahia te

mau rave 'ohipa i te huna i tō rātou hōho'a mata 'ia rave ana'e rātou i te 'ohipa i te hō'ē vāhi e fāri'ihia te ta'ata, 'aore rā i roto i te tahi fa'anahora'a e ha'apa'o i te tahi 'ohipa nā te Hau.

E'ita te paoti 'ohipa e nehenehe e fa'ahepo i te tahi rave 'ohipa 'ia 'ōmono mai i terā 'e terā 'ahu mai te mea 'aita e tītauhia nō terā huru 'ohipa 'e te fā ato'a ho'i o taua 'ohipa ra ('ei hi'ora'a, te 'ō'omora'a i te tahi 'ahu pāruru 'ei rāve'a pāruru fifi tīa'i-'ore-hia, 'aore rā te 'ahura'a i te tahi 'ahu fa'aau nō te tahi 'ohipa tapiho'ora'a, 'aore rā nō te fa'atīani i te hōho'a o te tahi tāpa'o taiete).

TE TI'AMĀRA'A PAE FA'ARO'O I ROTO I TE MAU FARE HA'API'IRA'A

16. E nehenehe ānei e fa'atupu i te ha'api'ira'a fa'aro'o i roto i te mau fare ha'api'ira'a a te Hau ?

'Aita. I Pōrīnetia Farāni, e mea 'ōpanihia te ha'api'ira'a fa'aro'o i roto i te mau fare ha'api'ira'a a te Hau.

17. E mea fa'ahepohia ānei te mau pīahi 'ia haere i te ha'api'ira'a fa'aro'o i roto i tā rātou fare ha'api'ira'a ?

I te mau fare ha'api'ira'a e 'ere nā te Hau 'e e parau fa'aau tā rātou i te Hau Farāni, 'aita ia te mau pīahi e fa'ahepohia 'ia haere i te ha'api'ira'a fa'aro'o tei hōro'ahia i roto i taua mau fare ha'api'ira'a ra.

'Āre'a nō te mau fare ha'api'ira'a e 'ere nā te Hau 'e 'aita e parau fa'aau i te Hau Farāni, e mea au a'e paha i te mau pīahi 'ia fārerei i te fa'aterera'a o tō rātou fare ha'api'ira'a, nō te ani ē, e mea fa'ahepohia ānei 'ia haere i taua mau ha'api'ira'a fa'aro'o ra.

18. E nehenehe ānei tā te mau pīahi e ha'apae i te haere i te ha'api'ira'a 'aore rā i te mau 'ohipa i tārenahia e te fare ha'api'ira'a, nō tō rātou mau ti'aturira'a pae fa'aro'o ?

'Aita. E mea fa'ahepohia i te mau pīahi 'ia haere i te ha'api'ira'a 'ia au i te 'īrava L.P. 1 o te Ture Fenua nūmera 2017-15 nō te 13 nō Tiurai 2017 nō ni'a i te ture nō te ha'api'ira'a i Pōrīnetia Farāni, 'o tē fa'ahepo nei 'ia tae mai rātou i roto i te mau ha'api'ira'a ato'a 'e te mau 'ohipa ato'a i tāpa'ohia tō rātou i'oa.

'Aita te 'ōfatira'a ti'aturira'a pae fa'aro'o i roto i te mau tumu tei fāri'ihia nō te ma'irira'a i te ha'api'ira'a ('a hi'o i te 'īrava o te Ture Fenua nūmera 2017-15 nō te 13 nō Tiurai 2017).

19. E nehenehe ānei tā te mau pīahi e fa'ahuru 'ē i te mau 'ahu ha'api'ira'a nō tō rātou mau ti'aturira'a pae fa'aro'o ?

'Ia fa'ahepo ana'e te ture roto a te tahi fare ha'api'ira'a 'ia 'ō'omo mai i te tahi 'ahu fa'aau, 'e 'aita e fa'ati'ahia te mau pīahi 'ia fa'ahuru 'ē i te reira, e'ita iho ā 'ia tāna e nehenehe e fa'ahuru 'ē i te reira nō te tahi tumu i te pae fa'aro'o.

TE TAU FA'EHOU 'E TE TAU TĀVINIRA'A NĀ TE HAU

*20. Tē vai ra ānei te tau fa'ehou 'aore
rā te tau tāvinira'a nā te Hau tei
fa'ahepohia, 'e mai te peu tē vai ra, e
parau fa'ati'a ta'a 'ē ānei tei hōro'ahia i
te ta'ata nō tōna fa'aro'o ?*

'Aita e tau fa'ehou fa'ahepohia i Pōrīnetia Farāni. Terā rā, e mea ti'a i te mau tāne Farāni ato'a mai te 16 matahiti ē ni'a atu, 'ia haere i te tāpa'ora'a i'oa fa'ahepohia nō te tai'ora'a hui'atira, nō te tomo i muri iho i roto i te Mahana nō te pāururua'a 'e te tino hui'atira (JDC). Mai te peu 'aita 'ōna e rave i teie mau 'ohipa, e'ita 'oia e nehenehe e tāpa'o iāna nō te mau hi'opo'ara'a 'e te mau tata'ura'a a te Hau (te parau fa'ahoro pere'o'o, te baccalaureat, 'e tē vai atu ra), hou i te 25ra'a o tōna matahiti.

E'ita e nehenehe e 'ape i te tomo atu i roto i te JDC ma te parau ē 'o te fa'aro'o te tumu.

TE HA'APA'ORA'A 'E TE TIRIPUNA

*21. E nehenehe ānei tā'u e ha'apae i
te hōreo i mua i te ture nō tō'u mau
ti'aturira'a pae fa'aro'o?*

'Aita. 'Ia au i te Ture nō te ha'avāra'a i te hara rahi, te mau ta'ata ato'a tei tītauhia 'ia fa'aro'ohia 'ei 'ite, tītauhia ia rātou 'ia haere atu 'e 'ia hōreo hou 'a parau ai i te mea tā rātou i 'ite. 'Aore rā, e nehenehe ato'a te 'ite e « parau fafau » 'ia parau i te tā'ato'ara'a o te parau mau, 'e te parau mau ana'e ('eiaha pa'i te hōreo). I mua i te ture, 'aita tā te 'ite e rāve'a nō te ha'apae i te hōreora'a, 'aore rā nō te ha'apae i te parau-fafau-ra'a 'ia parau i te tā'ato'ara'a o te parau mau, noa atu tōna ti'aturira'a pae fa'aro'o.

Mai te mea noa atu e pāto'i te 'ite i te hōreo, 'aore rā i te parau fafau 'ia parau i te tā'āto'ara'a o te parau mau, e riro te tahi utu'a i te topa i ni'a iāna ē rae'a roa te fāito 3 750 euros (Īrava 434-15-15-1 o te Ture nō te hara rahi).

22. E nehenehe ānei tā te mau ha'avā e rave i te mau fa'aotira'a tei niuhia i ni'a i tō rātou mau ti'aturira'a pae fa'aro'o ?

'Aita. E mea ti'a i te mau ha'avā 'ia rave i tā rātou mau fa'aotira'a 'ia au i te ture 'e te mana o te mau fa'aotira'a i ravehia i mua a'e. E'ita tā rātou e nehenehe e fa'aoti 'ia au i tō rātou mau ti'aturira'a pae fa'aro'o.

23. Tē vai ra ānei te tahi pārorura'a nō te parau mo'e tei fa'a'itehia i te mau ti'a fa'atere pae fa'aro'o ?

'Ia au i te Puta pu'e ture utu'a, mai te mea e pūharahia te parau huru huna e te tahi ta'ata tei ti'aturihia e tāpe'a noa i te reira, nō tōna ti'ara'a 'aore rā tōna tōro'a, nō tāna 'ohipa 'aore rā te tahi tonora'a 'ohipa tau poto, e fa'autu'ahia ia hō'ē matahiti fare tāpe'ara'a 'e 15 000 euros utu'a moni.

'Ua ha'apāpū te mau fa'aotira'a i ravehia i mua a'e nā te ture ē, te mau parau mo'e i fa'a'itehia i mua i te tahi ti'a fa'atere pae fa'aro'o, e fa'arirohia ia 'ei parau huna. Terā rā, e ti'ara'a mana tō te ti'a fa'atere pae fa'aro'o 'ia fa'a'ite i te mau ti'a a te Hau 'aore rā i te mau ti'a nō te Ture, i te mau parau i fa'a'ite-ōmo'e-hia iāna, mai te peu ē nō ni'a te reira i te tahi hara rahi 'o tē nehenehe ā e ārai 'aore rā e nehenehe ā e fa'aiti i te 'ino, 'aore rā e hāmani-'ino-ra'a 'aore rā e rave-'ino-ra'a i te pae 'āpeni i ni'a i te tahi tamari'i 'aore rā i te tahi ta'ata pāroru 'ore.

